

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Un felis fin di siman pa bo mi kompañero. Kontentu ku bo tei riba nos plenchi. Si manera bo di, nos a drenta novèmber. Preparashonnan a kuminsá tur kaminda kaba pa fin di aña. Adòrnonan ta pará diferente kaminda i tur hende a kuminsá prepará pa fin di aña. Tin a kuminsá fèrf nan kas, otro a wak kòrtina nobo. E otro a kuminsá wak su kolekshon di paña pa e bista fin di aña. Pero tin algun ku a kuminsá wak kon a bai ku nan metanan di e aña aki. Nan a kuminsá prepará kon nan por yuda nan próhimo èkstra e fin di aña aki. Nan ta konsentrá menos riba kos i fiesta i mas riba hasi bon i saka man pa yuda otro. No yuda ku material so, pero mas bien yuda ku duna kariño i atenshon. Bishitá kasnan di ansiano mas tantu biaha, bishitá of buska muchanan di e kasnan di mucha pa nan bin pasa dia. Òf simplemente adoptá un bestia pa duna kariño i amor. Tin diferente manera pa nos duna atenshon i amor, loke ta bal mas den e bida aki. Stima bestia, stima mata, stima hende i trata tur ku kariño.

E dianan tras di lomba nos a mira ku Minister Leitoë ta trahando duru riba seguridat rondó di skolnan. Nos ta gradisido pa esaki. Ta nesario pa nos tur yuda tene nos muchanan saif. Duna di bo man. No ta abo so tin yu ku bo ke pa ta seif, tur mayor tin e mesun responsabilidat. Pues no blokia tráfiko baha bo yu dilanti porta i pone tur otro mucha den peliger. Mi ta rekomendabu para un dia ku bo por dilanti porta di skol i vigilá e situashon. Lo bo mira kuantu hende ta aktua sin tene kuenta ku seguridat di e hóbennan. Hopi biaha no ta paso nan ke hasie konsientemente, pero paso nan ke protehá nan yu i sin mira kon esaki ta un manera no sosial i no seif pa otronan. Kisas skolnan mester laga unhende filma un dia dilanti porta di skol tur e susedonnan i pasa nan un dia na skol pa tur hende wak. Kisas bo mes lo spanta di bo mes. Anto huntu ku skol papia i traha palabrashon pa tur hende por yuda kuida. Danki pa traha huntu na bienestar di nos muchanan.

Den agènda

Fakansi di skol:

21 desèmber te ku 3 yanuari.

Selebrashon

Selebrashon hubilarionan di RK i brindis di aña nobo 11 di yanuari

Riba roster

Den luna di òktober internashonalmente pero tambe lokal, tin masha hopi dia ku ta selebrá komo un dia spesial, un di e dianan aki ta dia di bestia, 4 di òktober. Durante luna di sèptèmber alumnonan di Coromoto College di grupo 1 i 2 a tuma tempu pa siña masha hopi mes di bestianan di ‘boerderij’, pa nos konosí komo bestia nan ku nos ta yama bestia di krio di kas i den kurá. Alumnonan di grupo 3 i 4 a tuma figurativamente un dùik den nos lamannan blou i siña hopi di bestianan di laman. Gruponan 5 i 6 a imaginá nan mes ta keiru rònt mundu, yega te Asia i Afrika. Asina nan a engrandesé nan konosementu di bestianan ku ta biba den naturalesa i tambe nan a siña tokante ‘Wereld Natuur Fonds’. Pa finalisá alumnonan di grupo 7 i 8 a bira eksperto di tur loke ta rèptil i insekto. Dia 4 di òktober, alumnonan di Coromoto College konhunto ku nan maestronan di klas a organisá un eksposishon bou di nan “overdekte”, un eksposishon yená ku konosementu i kreatividad i asina informá tur otro alumno di skol kiko tur nan a siña. Abo tabata sa ku tin kasi 5000 sorto di kakalaka? Ku kakalaka por biba un siman sin su kabes? Ku nan por wanta nan rosea aden pa 40 minüt largu? Abo tabata sa ku olefantenan por hole awa for di un distansia di 5 kilometer? Ku abestrus nan por kore mas lihé ku kabai i ku nan por brùl manera un leon? Tur esakinan i hopi mas alumnonan di Coromoto College a siña di bestianan rònt mundu. Nan mes a buska informashon kombiná ku obranan sumamente kreativo i di e forma ei duna un bunita eksposishon. Alumnonan a interkambiá informashon ku otro alumnonan i mayornan di Coromoto College, kende tambe a bini skol i por a disfrutá di e informashon i arte di nan yunan. Plenchi ta trese e obranan aki pa bo tambe por mira e talento di nos muchanan.



Mi futuro despues di MIL.

Hóbennan di MIL a bin skol den fakansi di október pa traha un videoclip tokante nan futuro. Esaki ta demostrá kon nos hobennan ta motivá i e tim di skol tambe ta duna tur ku tin pa e hobennan. Hobennan a para ketu na preguntanan manera: ken tin influensha riba nos eskoho di estudio, ken ta e persona klave pa guiarni den mi eskoho. Nan a traha nan clip pa asina nan para ketu na nan situashon aktual i kuminsá anticipá i plania nan futuro.



Mi ta konta

Un persona eksitoso

No ta kuestion di haña e persona korekto so, pero traha riba un relashon bunita. No ta importante kon stimá i kuida e otro na kuminsamentu di un relashon, pero stima kuida te final.

Lo bo topa persona ku ta tira piedra riba bo, usa e piedranan aki pa traha bo brùg òf bo muraya pa logra bo metanan. Kòrda ta bo ta arkitekto di bo bida.

Buska unbon kurason i no un kara bunita. Loke ta bunita pafó no semper ta bon. Loke ta bon semper ta bunita.

No ta importante tene e bará di karta den bo man, ta importante sa kon hunga ku e bará ku bida dunabu.

Kòrda ora sla benta bu abou, no ta final ainda. Lanta i sigui te final.

Dios ta duna i pordoná, hende ta haña i lubidá. Sea gradisido.

Si bo ta kere ta bo wèker a lantabu awe mainta, pone bo wèker banda di un kadaver. Ta pa grasía di Dios bo a lanta.

Un prechi

Soeur Hedwig School a pone atenshon na dia di Ergo terapia. Nan a gradisí nan terapeuta pa tur bon trabou. Danki na tur terapeuta pa nan bon trabou.



Keyclub Frater Aurelio sbo ke yama presidente saliente di Kiwanis Yvette Vivas masha danki pa a sostené e club aki pa dos aña largu. Danki pa ta involvi den e aktividatnan di nos club. Un bon bini na Sra. Sharalin Passial Maduro, bonbini komo presidente nobo di Kiwanis. Key Club di Frater Aurelio ta deseá boso board tur klase di éksito i ta spera ku nan por sigui traha mesun dushi ku otro i aportá na e bienestar di nos komunidad.



Mucha djispou

Stefano: “Mama, bin hunga ku mi.”

Mama: “Mi yu bo no ta mira mi ta okupá, no strobami.”

Stefano: “Mama dikon mama hari ku e telefon anto?”

Mama: “Mi ta lesa kòs prèt riba mi telefòn.”

Stefano: “Mi ta sinti hopi tristu, mi tambe mag hana un telefon pa mi por hari i hunga ku ne?”

Mama: “Dios libra ta 2 aña so bo tin. Hunga ku bo outonan.”

Stefano: “Ora mi bira grandi ku mi kumpra mi telefon, mi tampoko no ta hunga ku mama. Mama ta haña straf i tin ku hunga mama so. Anto ora mama tin hamber mi tambe ta kaba riba ni telefon promé mi duna mama kuminda”